

Naalagaaffit Peqatigiit Innarluutilinnut isumaqatigiissutaata atortuulersinnejnarneranut aatillugu ussersornermik atuisut, innuttaasullu allat attaveqarniarnerminni ajornartorsiutillit isumaqatigiisummut ilaatinneqartut, nakorsiarnernanni malitseqartitsinermut kiisalu nangittumik katsorsarnejnarnerannut atatillugu allakkatigut nassuaammik tigusisalernissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.

(Inuit Ataqatigiit Inatsisartuni ilaasortaatitaannit saqqummiunneqartoq)

pillugu

siunnersuutip aappassaaneerneqarnissaanut

Ilaqtariinnermut Peqqissutsimullu Ataatsimiititaliap

ISUMALIUTISSIISUSIAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Laura Tàunâjik, Siumut, siulittaasoq
 Inatsisartunut ilaasortaq Mala Høy Kuko, Atassut, siulittaasup tullia
 Inatsisartunut ilaasortaq Jess Svane, Siumut
 Inatsisartunut ilaasortaq Karl-Kristian Kruse, Siumut
 Inatsisartunut ilaasortaq Debora Kleist, Inuit Ataqatigiit
 Inatsisartunut ilaasortaq Mimi Karlsen, Inuit Ataqatigiit
 Inatsisartunut ilaasortaq Kelly Berthelsen, Inuit Ataqatigiit

UKA 16-imí oktoberip qulingani siullermeerininnerup kingorna ataatsimiititaliap siunnersuut sukumiinerusumik misissorpaa.

Siunnersuutip imarisaa siunertaalu

Ussersornermik atuisut innuttaasullu allat attaveqarniarnerminni ajornartorsiuteqartut Naalagaaffit Peqatigiit isumaqatigiissutaannut ilaasut nakorsiarnerninni malitseqartitsinermik qanolu suliarineqarnissamut tunngasumik allakkatigut nassuaanneqartarnissaat aalajangiiffigisassatut siunnersuuteqarnikkut qulakkeerneqarnissaa siunnersuuteqartup kissaatigaa. Peqqinnissaqarfimmi sulisut iliniarsimasut napparsimasullu Naalagaaffit Peqatigiit Innarluutilinnut isumaqatigiissutaanut ilaasut immikkut isigisariaqartut akornanni paatsortoqarsinnaanera sappingnisamik pinngitsoortinneqarnissaa aalajangiiffigisassatut siunnersuutip matuma siunertaraa.

Siunnersuutip Inatsisartuni siullermeerneqarnera

Ussersornermik atuisut innuttaasullu allat attaveqarniarnermikkut ajornartorsiutillit innarluutilinnut isumaqatigiissummut ullumikkut ilaareersut malitseqartitsisumik nakorsiarnermut suliallu ingerlaqqinnissaanut attaveqaqatigiinnermut atatillugu allakkatigut ilisimatinneqarnissamut periarfissaqartut akissuteqaammi Naalakkersuisut nassuiaapput. Peqqinnissamik suliaqartut nalilersuilluareernermikkut ullumikkut nutserisunik atuisarput, nakorsiartunut atatillugu tusilartunut ussersorluni nutserisut matumani ilaapput. Aammattaaq napparsimasunut atatillugu allakkatigut attaveqatigiinnermut atortorissaarutit naleqqussakkat atorlugit, matumani napparsimasut immikkut pisariaqartitsisunut attaveqartoqaratarpooq. Ussersorluni nutserisut atorlugit sullissineq tamatigut pitsaanerpaaneq ajornera Naalakkersuisut nassuerutigaat, peqqinnissaqarfimmili napparsimasunut ataatsimut isigalugu pitsaanerulersitsinissamut qarasaasiatigut nalunaarsuisalernissap atuutilersinneqarnissaa sulissutigineqarpoq. Pingaartumik tusilartunut tunngatillugu IPIS KTK-mik suleqateqarnissamik isumaqatigiissuteqarpoq. Matumani qarasaasiatigut attaveqaat Skype aqutigalugu ungasianit nutserisinnaanermik neqerooruteqarsinnaalernissaa siunertarineqarluni. Kalaallisut atuaassut Martha peqqinnissaqarfiup naqinnernik ilisarinnissinnaangitsunut isigiarsuttunullu attaveqarniarneranut aamma nukittorsaataassaaq. Tassa Naalakkersuisut paasinninnerat naapertorlugu pineqartumi Naalagaaffit Peqatigiit innarluutilinnut isumaqatigiissutaa naammassineqarsimavoq, taamaalillunilu siunnersuut itigartinneqarnissaa Naalakkersuisunit innersuussutigineqarluni.

Peqqinnissaqarfimmeli napparsimasut pisariaqatitaat naapertorlugit sullinneqartarnissaat Siumup oqaaseqaammini saqqummiuppa. Naalagaaffit Peqatigiit innarluutillit pillugit isumaqatigiissutaa innarluutillit naligiimmik periarfissaqarnissaat atugaqarnissaallu siuarsartussaavaa, innuttaasunullu immikkut pisariaqartitsisunut pitsanngorsaanissamik Siumut suliniuteqarnini ingerlatiinnassavaa. Peqqinnissaqarfimmeli ussersorluni nutserisumik ilinniarsimasumik atorfinitstsisoqarnissaa Siumup kissaatigneruaa. Peqqinnissaqarfimmeli pitsanngorsaasoqartuarnissaa innersuussutigalugu siunnersuut Siumup tapersorsorpaa.

Nunarput pisortatigoortumik innarluutillit pillugit isumaqatigiissummut 2012-imi ilanggussimanerata pingaaruteqarnera Inuit Ataqatigiit erseqqissaatigaat. Taamaalilluni innarluutillit atugaasa sutigut tamatigut pitsanngorsarneqarnissaannut nunarput pisussaaffeqalerpoq. Peqqinnissakkut sullisisut napparsimasullu innarluutillit pilugit isumaqatigisummut ilaasut akornanni attaveqatigiinnerup qaffassarneqarnissaata qulakkeerneqarnissaa siunertaralugu siunnersuut Inuit Ataqatigiit tapersorsorpaa.

Naalagaaffit Peqatigiit innarluutillit pillugit isumaqatigiissutaannut ilangunnerup kingunerisaanik pisussaaffeqalerneq Atassutip aamma akuersarpaa. Peqqinnissaqarfimmeli peqqinnissakkut sullisisut napparsimasullu innarluutillit pillugit isumaqatigiissummut ilaasut akornanni attaveqarnerup pitsanngorsarneqarsinaanera Atassummit akornutissaqartinneqanngimmat siunnersuut Atassutip akuersarpaa.

Naalakkersuisut akissuteqaataat Demokraatinit tamakkiisumik akuersaarneqarmat siunnersuut itigartinneqassasoq inassutigaat. Pissutsit sukumiinerusumik misissorneqarnissaat Partii Naleqqap piumanerugaluarpaan siunnersuutilu Ilaqtariinnermut Ataatsimiitaliamit sukumiinerusumik suliarineqarnissaai innersuussutigaluq.

Apeqqut

Ataatsimiitaliap siunnersuummik suliaqarnerminut atugassaminik apeqqutit arlaqartut Peqqissutsimut Naalakkersuisumit akineqarnissaannik ataatsimiitaliamit qinnuigineqarpoq. Naalakkersuisup akissuteqaataata assilinera isumaliutissiisummut matumunnga ilanngussaq 1-itut ilanngunneqarpoq. Akissuteqaammi ataatsimiitaliap apeqquteqaataa ilanngunneqarpoq.

Ataatsimiitaliap siunnersuummik suliaqarnera

Nunatta Naalagaaffit Peqatigiit innarluutillit pillugit isumaqatigiissutaanut ilanngussimanera pisussaaffiliivoq. Tamanna aamma peqqinnissaqarfiup napparsimasullu akornanni immikkullu nappaatilinnut innarluutillit pillugit isumaqatigiissummut ilaasunut atuuppoq.

Innarluutillit innarluuteqanngitsullu assigiimmik naleqarnerat qulakkeerneqarnissaai pillugu innarluutillit pillugit isumaqatigiissut tunngaviusumi pineqarpoq, taamaaliornikkut innarluutilik sapinngisamik annertunerpaamik allatuulli pisinnaatitaaffeqalersinnaaqqullugu, taamaaliornikkullu ulluinnarni inuuniarnikkullu innarluuteqanngitsutuulli atugaqarnissaminut periarfissinneqarsinnaaqqullugit. Innarluutillit pillugit isumaqatigiissut inuit akornanni assigiinnngissuseqarnermut naligiinnermullu tunngaviusumik ataqqinninneruvoq. Innarluutillit pillugit isumaqatigiissutip eqqortinneqarnissaai piviusunut inuiaqatigiinnilu inooqataanermut ersersitsisussaavoq.

Innarluutillit sullinneqarnerat pitsaanerulersissagutsigu innarluutilinnullu attaveqarnerup atugaallu nukitorsarneqassappata tamanna ataatsimiitaliaq naapertorlugu malittarineqartariaqarpoq. Teknikkikkut suliallu pitsangoriarneri periarfissanik nutaanik pilersitsippu, pitsangorsaataasinnaasut eqqarsaatigilluareerlugit atorluarneqartariaqarput. Tamatumunnga Naalakkersuisut annertuumik eqqumanerat ataatsimiitaliamit nuanaarutigineqarpoq, teknikkikkut suliniutigineqartullu nutaat siunnersuutip siullermeerneqarnerani Naalakkersuisut nassuaatigisaat akissuteqaallu ilanngussaq 1 nassiunneqartoq ataatsimiitaliamit tusaatissatut tiguneqarlutik.

Peqqinnissaqarfiup ilinniartitaanikkut pisariaqartitaminiut naleqqussartuarnissaanik naammassinninniartuarnissaanillu ataatsimiitaliamit kaammattorneqarpoq, matumanit peqqinnissakkut sullisisunik ilinniartitseqqinnissami pikkorissarnernillu pisariaqartinneqartut ilanngullugit, taamaaliornikkut pisariaqartitsineq naapertorlugu ilinniakkatigut naleqqussarnissamullu qaffasissumik inissisimajuarnissamut pitsaassutsit piumaneqartut,

isumaqatigiissutitigut pisussaaffiit eqqortinnejarsinnaaqquulligit. Napparsimasunut pineqartunut eqimattatut assigiaartuusutut oqaatigineqarsinnaanngitsunut attaveqarnerup pitsanngorsarneqarlunilu nukitorsarneqarnissaa sulissutiguarneqassaaq.

Peqqinnissaqarfimmi ussersorluni nutserisumik atorfinititsinissamik pisariaqartitsisoqarnersoq, imaluunniit innarluutillit sullinneqarnerisa napparsimasullu oqaatsitigut aporfeqarnertik paasinninniarnermiluunniit unammilligassaqarnertik pissutigalugu immikkut pisariaqartitsisunut sullissineq ataatsimut isigalugu nukitorsarneqarnissaa siunertalarugu sulisunik aalaakkaasunik pikkorissaanissap annertunerpaamik qulakkeerneqarnissaa siumut isigisumik eqqarsaatigineqartariaqarpoq.

Ataatsimiititaliap Naalakkersuisunut apeqquteqarnerminut atatillugu peqqinnissakkut sulisut nipangersimasussaatitaanerannut, napparsimasut ataasiakkaat pisinnaatitaaffi qanigisaasunullu pissutsit suleqatigiissutigineqarnerat ataqtiginnerallu sukumiinerusumik paasisaqrfiginissaa ataatsimiititaliamit kissaatigineqarpoq.

Apeqquteqaammut 9-mut akissuteqaat, matuman i lanngullugu Naalakkersuisunit saqqummiunneqartoq, pisariaqartitsineq naapertorlugu qanigisaasut kisimik peqqinnissaqarfimmit paassisutissinneqartarnissaat ataatsimiititaliap tusaatissatut tiguaa, napparsimasup suliarineqarnissaanut isummernissamut taamaallaat tunngassuteqarmat.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq, aalajangiiffigisassatut siunnersuutip piviusunngortinneqarnerani aningaasatigut allaffissornikkullu kingunerisassai siunnersummut tunngavilersuutini allaaserineqassasut.

Siunnersuutip piviusunngortinneqarnissaanut siunnersummi aningaasatigut kingunerisassat allaaserineqarsimasut, nukiit innarluutillit pillugit isumaqatigiissutip peqqinnissaqarfimmit peqqinnissaqarfifulluunniit timalerniarneqassasut ataatsimiititaliamit tusaatissatut tiguneqarpoq.

Ataatsimiititaliap inassuteqaatai

Suliassaqarfimmi ineriartorneq aammalu suliniutit aallartinneqartut iluarisimaarlugit ataatsimut isigalugu ataatsimiititaliaq isumaqarpoq nunatsinni peqqinnissaqarfimmi ingerlaavartumik naleqqussaaneq aammalu innarluutillit pillugit isumaqatigiissutip atuutilersinneqarnissaa eqqarsaatigalugu pisussaaffinnik ineriartortitsiuarnissaq napparsimasut isumannaatsumik sullinneqarnissaannik nukitorsaanissap pitsanngorsarnissaa aammalu tamatumani ineriartornissamut periarfissat atorluarnissaat eqqarsaatigalugu ingerlaavartuusariaqarput. Napparsimasunut innarluutillit pillugit isumaqatigiissummut ilaasunut, aammalu napparsimasunut allanut immikkut attaveqarniarnermut pisariaqartitsisunut allatullu pisariaqartitsisunut tamanna aammaa atuuppoq.

**Taama paasinnilluni ataatsimiititaliap isumaqatigiittup siunnersuutip
akuerineqarnissaa inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassangortippaa.

Laura Tàunâjik

Siulittaasoq

Mala Høy Kuko

Jess Svane

Karl-Kristian Kruse

Debora Kleist

Mimi Karlsen

Kelly Berthelsen